



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretionem Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

Praefatio Ad Lectorem.

urn:nbn:de:hbz:466:1-9969



PRÆFATIO AD LECTOREM.

Multum luctatus sum, Christiane Lector, mecum cogitans & animo volvens, quidnam potissimum in hoc vestibulo tecum colloquerer. Diu tamen cogitanti nihil occurrit, nisi ut plurimam tibi salutem ex imis sensibus optem; quæ utinam per hunc Librum vera & æterna tibi contingat. In hoc voto sistere satius est, quàm te proluxa præfatione gravare: quicquid enim addidero quid erit? An favores tuos & laudes captem? Parce, ista non ambio. An tuam saltem benevolentiam exquisitis verborum flosculis conciliem? Hoc non fit verbis, sed mutuis officiis & beneficiis. An de usu & praxi hujus Opusculi documenta præscribam? Congererem inutiliter, quæ infra suis locis utiliùs leges. An materiæ utilitatem & præstantiam extollam? Iam ex titulo & prospectu intellexisti nihil melius fore, quàm citò ad Deum pervenire. An formam, stylum & dicendi characterem, quod plerique solent, excusem? Neglexi hæc lenocinia, Manilii versum sequutus,

Ornari res ipsa vetat, contenta doceri.

An studium meum prædicem & laborem, qui multus fuit? Pietati scripsi, non pompæ. An te de scopo instituti Operis præmoneam? Frustra, quia in limine primi capitis descriptus est. An adversus maledicos & obrectatores tuum implorem patrocinium? Non est necesse, nam sperno & fugio hoc genus hominum; quod si non effugio, causa Dei hic agitur, ipse tuebitur & judicabit. An pro terminis & phrasibus mysticis præmittam Apologeticon? Nec quidquam: à verbis enim obscuris abstinui, vel si quas materia exigente intermiscui, non mea, sed rerum hæc culpa est, quæ non aliter tractari possunt. An objectiones præoccupem, quibus convelli studium meum potest & audacia reprehendi? Non admittunt hæc pagine talem lectorem qui velit contentionibus deservire & clarescere inimiciis. Tum ultrò ipse fateor me rem sublimem, non meam, sed alienam experientiâ edoctum scripsisse; sicut scriptum est: Credidi propter quod locutus sum. Adde solatium meum esse de perfectione discedere, instar languentium, qui cum vacent à sanitate, de bonis ejus tacere non norunt. Denique generosa res est in altum conari: quæ causa igitur mihi est, ut te sine fructu hic morer? Nulla, nisi ut Deum ames & ad eum properes, ejusque Gratiâ mihi concilies: ne in semita immobilis hæream, dum aliis ad metam festinantibus viam ostendo, Vale.